

百名家詩選

小中

魏子曰往余讀廬江龔宗伯題新柳堂詩暨大
梁周侍郎月夜梅花下懷宗定九村居之作云
意中常欲到新柳讀書堂每思尋其堂而不知
處及過邢溝始知堂在廣陵城東爲晉謝安石
芙蓉墅近宗子定九卜築其中舊有芙蓉別業
小香居花間亭梅西堂諸勝今皆荒蕪不存悵
焉者久之及登其堂讀其詩知與濟南司勳王
客二王交善司勳評其集云今人言詩古體動

稱漢魏黃初以降若不屑者定九獨不廢六朝
今人言詩近體動稱初盛大曆以還若不屑者
定九獨不廢中晚蓋今人爲詩多以郭郭而定
九以神韻今人爲詩多以剽襲而定九以研精
也至主客評其芙蓉集爲青春鸚鵡楊柳樓臺
極得陰鏗何遜之體意得處往往欲逼二謝絕
句尤得樊川玉溪諸家之妙蘭陵鄒程邨每語
余云定九避地東原藏書百卷鴻妻驥子衡門
蕭然江右李太虛宗伯有題芙蓉集云江淹夢

筆筆生花宗鼎新詩萼綠華昨夜讀君新樂府
芙蓉秋水映窓紗觀諸公之贈言可以知其人
與詩矣至于家學淵源有傳巖公爲之祖方城
公爲之從祖方城與歷下瑯琊爲中原七子傳
巖與陶會稽董華亭稱同榜三才則廣陽志乘
已備載之余又何必多及也

百名家詩選

福清魏憲惟度輯選

宣城施閏章愚山吳江顧有孝茂倫

嘉善曹爾堪顧菴三原孫枝蔚豹人

叅

宗元鼎字定九號小香廣陵人

東原雜詩

處處春鳩鳴一雨郊原足陌上楊柳青社日酒
新熟農家歲事勤早已驅耕犢

村居異塵境暝色無人影愛此柴門夜倚策消

清景微月照前溪松風自煮茗

流光近初夏園影紛成綠亭午一來尋攜書偃
茅屋但聞好鳥音時時媚幽獨

角巾白袷衣行散花時節隱隱梵放聲樹杪和
雲結閒立看春潭夕陽亂明滅

鳥喧盡愈靜花滿園滋寂時有幽人至臨風一
吹笛吹罷澹無言坐對空庭聞

秋夜懷王阮亭先生

元曉耽雲棲雅主好文詠自非折節流何以禪

相映在昔王撫軍牽絲稱水鏡瀟瀟落葵扇霏
霏玉塵柄既憫滄洲趣坐嘯淮南政于今京雒
去騷雅誰與竝

春日同諸公集汪叔定蛟門見山樓分韻
得素字

晚歲息獻酬歸翼瘁遠翥結廬在東原閒情託
毫素好鳥旣相和孤雲亦自遇方春入城郭悠
然任籃輿正值賞心儔樽酒敦薄幕高情寄簪
綬會解琴中趣樓頭况南山烟霞目所寓酒酣

各限韻分析陶詩句

時用淵明聞多素心人樂與數晨夕爲韻

寄前少司農周櫟園先生時觀察青州

讀史最愛庾武昌南樓理詠秋氣涼其時幕吏
殷與王老子亦復據匡床賦詩直學李長庚漢
中太守醉相迎餐霞樓上玉笙清凌霄意氣當
筵生櫟園先生來邗上清姿毅骨尊時望正人
何必蹈腐儒風月高空與豪宕猶記寒冬至日
勢稜稜侍郎賈酒留賓朋座中詩人分部曲徐
君存永

延

許大玉

珽

關陝才推孫豹人

枝半千

詩畫迥清新

賢龔

長子英雄亦瑰異

師

蠻箋小楷

汪舟次

楫

一時酒政頗森嚴橫筆容吾縱飛騎

當年數日不相見道氣堅貞特相念夜深獨步

梅花下嘯咏懷余意瀟灑空江澄客夢冷月定

花香

二句乃先生懷余詩

吟玩佳句何時忘屈指此聚已

三載今日聲名冠北海初春持節廣陵過舊惠

羣黎遮道多黃公酒肆雖相近顧此邈若山與

河曾寄新詩書竹扇春日因風託鴻便不知驛

使可能傳別夢與之堯山邊堯山稷山俱名蹟

不得從遊空自惜蕭條閉戶揚子居三年又困
東堂策揚州亦是南青州南北青州千里隔青
州代有古名臣仲淹富弼公等倫散地豈久沉
智勇况有閩海功難泯咫尺鸞書徵蹇諤輔臣
入對天章閣筆札條陳君莫辭賤子賡吟慶曆
詩

惜瓊詞爲芝麓先生悼亡

松桂盈山阿薜蘿滿巖澤瓊花凋瘁無二株要
是人間真可惜夫人才思映香閨清新宛與令

暉齊鳥絲展對牕前咏班管拈從花下題衛家
小楷冰爲骨玉壺曉濯瑤臺月况復畫蘭香九
畹綠萼紫莖芳谷晚枝枝葉葉寄幽心空谷佳
人風韻遠弱齡徐淑秦嘉娶素琴明鏡情好固
神清故有林下風京陵家範世所慕奉常名重
晉山濤閒集高朋揮紈素當年稽阮契金蘭率
皆纖手製傳餐三更竹葉梨花釀午夜芹芽碧
玉盤官清道重心如木頻典春衣佐夫子家貧
不厭士依劉尚嗟范叔寒如此兩回亞相宦京

幾費務宜家補袞衣湘簾自是經綸侶豈獨琴
絃按素徽頃聞七月秋風猛梧桐葉落愁金井
可憐蕙弱露難朦猝覽蒙莊驚責影塵世脩短
信有期荀郎身裂終何爲光陰不向粧臺借水
淨山媚玉瘦時萑蒲九節杳西河三山芝草竟
無多鶴辭吳市空悲舞鳳去秦臺柰若何萃萃
蘧豆陳菱藕朔望茵幃帳杯酒傷心微雨濕芙
蓉

芝麓公有三
十二芙蓉軒

可似平生對案否疇昔長齋禮

繡佛去來無繫終無物何須歸月並還星娑羅

雙樹衣輕拂黯黯霜華月透紗商音如泣雁行
斜春颿閣上腸應斷且寄長歌拭淚花

王西樵先生屬蕭靈曦畫西湖三舟圖作

歌贈之兼簡蕭子

乙巳歲司勳王西樵先生與宋荔裳觀察楊
執玉太常同客湖上時盛夏各僦舟以居每
風景晴好率命棹于兩堤六橋之間入閩林
鐵崖憲使作圖爲宋公贈越歲丙午秋司勳
與觀察重晤維揚時太常已復燕遊而觀察
又將北去司勳撫玩之餘中情交集因命蕭
子做圖襲跡俾
余作歌以識之

君不見昔日陶崑山日泛三舟西塞間一載飲

饌一賓客一與雲卿焦遂浮家宅摩訶寶劍常
隨身女樂清商烟月夕當時號作水仙遊至今
秋夜蘆花白又不見吳中陸魯望蓬席扁舟江
水上筆床茶竈時往來笠澤松陵共酬倡往事
悠悠勿復陳西湖今有泛遊人王楊才思原無
敵池上新翻宋絕倫諸公欣然爲曠達杯酒乾
坤任軒豁湖邊也復買三舟尋勝標新爛慢遊
長堤橫截衝天漢六橋雙對水中流閒話山高
封寶石漫聽湖聖見金牛湖心夜靜涼風發秋

色先催暑氣歇。麝院荷香泊。妓舡平湖玉色沉。
冰月扇底歌能遏。彩雲掌中舞復嬌。羅襪入關。
鐵崖老林逋。買絲畫得三舟圖。青蒼北苑得意。
筆幽窈。林麓動狂呼。直令蘇堤配蘇小。如將西
子比西湖。咫尺繁華竟疇昔。風流聚散湖山隔。
江干垂柳廣陵津。依稀猶似西泠陌。騷賦還逢
宋大夫。京雒故人楊執戟。是時寂寞蟬無聲。美
人于焉心不懌。那堪九辯悲秋人。又復攜圖悵
行役。焉得并州快剪刀。剪取南屏一幅高。畫家

誰好手家聲舊跡河東守作詩誰擅場少文多
病臥南陽王公乘輿捲鵝溪兼命畫就爲之題
日望丹青狀天目蘭陵雅性尚高東我今爲作
三舟曲苑棹輕煙湖影綠何須十日一水五日
石聊示此歌相迫促

早春河豚歌

江南荻芽臘月生江洲河豚破春有歲初一尾
直千錢競嗜奇珍新上口味真淡爽誰與齊鱗
魚雖美失之厚是時江鱗亦清鮮品終不敢登

左右吾生最愛西施乳

河豚腹中上品也

酥酪尊羹俱

下走惜乎聖俞長于詩

梅聖俞

比之龍蛇何不偶

兼言怪狀毒莫加喪軀如豚鑊鄒手尋常食物
馬牛羊苟失庖煎寧免咎吾云此物魚傾城一
顧再顧何妨否胡爲元章畏此羹膾本猶然躊
慮久潤州城外瓜渚邊嬌歌玉嫩當鑪婦快呼
蕉漿與河豚解佩同沽酒一斗

壬子四月八日閒臥小香居念隔歲此時

坐白門周櫟園先生恕老堂中瞻禮間

立本佛像及貫休羅漢十六軸漫賦長
歌爲寄

隔年此日長干道。恕老堂中風景好。今年此日
小香居。枕茗爐香只自如此日。人傳浴佛節。江
南禪院尤佳絕。都梁安息灌金盆。鏡鼓香花隨
處潔。從來佛事重蕭梁。遺俗千年人未忘。白象
當年不可問。雪山往跡空論量。猶記恕老堂中
逢此日。清齋時菓消閒逸。先生道貌手摩尼。昨
夕爲觴初度時。堂中何所有。立本佛像巍巍尊。

東西何所設貫休羅漢懸兩軒我聞右相應務
才謂立本丹青神妙絕塵埃六朝名士皆能畫公

際初唐畫獨推至今人說凌煙閣衣冠偉麗光
錯落又云貌寫秦王府學士風標鬱秀古况是
西方之聖人不治不亂何其神博陵能貌其清
淨巨力龍象法中身貫休晚唐詩中傑禪月篆
隸人稱說所畫羅漢形骨奇云是入定親見之
我時一一瞻梵相袈裟生動氣道上至今猶如
在眼前侍者傍立精神傳聞畫貫畫不易得珍

惜須當具全力先生爲官數十載家無長物蕭然在只今惟有數卷書金石遺文充做廬何時買棹金陵渡看畫焚香對剪蔬

梅花落

玉牕斜捲真珠箔美人獨坐梅偏落祇謂梅花送曉粧不道花香人更香若看百媚臨風倚美人自好梅難比但論顏色教澹妍梅花美人相對憐寒芳袖出纖手折花枝隔窓牖嬌攀無力不勝花枝枝翻落隔墻家

過龔半千高士讀架上書

真是書連屋虛窓擁百城野雲沉案影亭葉助
茶聲眠放千年濶交延斗室清豈徒分甲乙空
博鄴侯名

桃葉渡同黃仙裳望報恩寺塔燈卽次仙
裳韻

秦淮忽驚見光闌白層層銀漢鋪秋水金陵射
塔燈橋高觀自切夜淨色逾澄明發同登頂吾
衰怯未能

春晚獨坐簡孫無言

晚院風初定春宵月半微江花寒食近塞雁暖
雲歸索莫襟懷剩蹉跎願力違何時招舊隱同
老釣魚磯

瓜叟

早摘浮瓜賣身肩妻負囊顏顏風雨剝赤腳樹
皮蒼不剖晶瓢嚼空尋井水嘗豈知歸價少兒
女壓輕筐

題清涼山禪菴竹院

梵宇遊難遍秋聲引客聽花深行欲盡徑轉又
堪停萬竹斜封屋一僧孤對經此中忘世味惟
有澗青冥

雨中同陳其年孫又百飲王西樵先生寓園

秋色甚寥落故鄉仍索居喜同王逸少相望隔
園廬閒極也能過交真不計疎尋常杯酒外惟
論古今書

雨中聞剝啄知是賞心招莫惜衝泥去何曾策

杖遇到亭桐葉滿靜坐桂香饒黯黯蕪城暮濃
雲愛薄霄

春日東原

漫寄樽中興悠然向夕曛黃花光菜圃紅掌淨
鵝羣水曲連村抱原平一徑分倦歸還倚樹遙
望隔江雲

二月二日追和李義山原韻

白袷穿花載酒行暖風吹出杏園笙粉垣人弄
鞦韆影芳草春生蹴鞠情近水車船爭野渡遠

邨聲鼓獵郊營朝來莫訝啼鶯少二月先聽百舌聲

庚寅春日陪太常龔孝升先生飲吳園次
玉琴齋時太常將還都門

永夜閒樽逞逸才官街更鼓暗相催頻年寄跡
三春柳此夕多情二月杯燕杏花遲深悵望鴈
歸人去共徘徊座中只有吳郎醉贏得琴心上
玉臺

揚州早鴈

風急秋高嘹唳清晚煙斜度廣陵城隋宮已改
還翻影水調初停忽數聲淚逐楚娥回首落愁
從江客倚樓生年年依舊蘆花冷幾日春深又
北征

童子以桂花一枝插瓶中

異香幽靜晚風吹每愛清秋及此時斜插小瓶
依竹几夜深引動北山思

莫愁湖

洛陽漢水兼江左同是莫愁分作身南北六朝

皆一轍山河不愛愛佳人

秦淮

依然渡口秦淮月却憶當年看月時
夜靜吳儂翻白雪曲欄干畔洞簫吹

邀笛步

冷冷青溪秋月明依稀三弄岸邊生
行人不問長淮戰惟愛柯亭笛裏聲

百尺樓

素襪翩翩月一鉤凌雲風致想高樓
江南歌舞

尋常事便遣曹彬下蔣州

勞勞亭

席上陽關馬上春
勞勞閱盡古今人
偏生搖曳迎風柳
不向家園向陌塵

古意

沉沉煙柳汴河邊
行到郵亭兩岸蟬
當日征人含淚語
分明爲約只三年

題孫豹人抱琴圖小像

長松千尺挺宜陽
箕踞孫郎態更狂
世上知音

人不見一絃扯去待稽康

讀太倉王端士芝廬集

一卷芝廬手自持果然冰雪澆新詩連朝細咏
北窻下引得隣家聽短籬

淮陰過韓侯釣臺

荒臺空見草萋萋楚水殘碑落日低若憶當年
垂釣事太公韓信總封齊

小引

魏子曰癸丑客天雄冬深無雪當事諸公憂民
憂者命余賦之余謂賦以肖物之形也無其物
而擬爲之則古今賦雪者多矣何必余何必今
日強爲招雪詞以代之命童子六七人歌以侑
酒適同業吳星若以毛亦史詩刻成促余小序
余取而再讀之質諸當事曰此一團白雪也使
有力者吹之可繽紛天下東明令楊集虛曰陽
春再發兮黍谷匪幽疇嗣厥徽兮白雪樓元城

令陳蘭涯曰皎皎白駒兮虞仲峰頭飛此洪濤
兮有弇州大名太守顧奕聞曰賒洞庭之月色
兮川嶽與遊剪此冰雪之姿兮淒水悠悠觀察
孔先生起而揚言曰兩曜繼光兮六出無花農
夫望歲兮猿猴滿車安得此錦心玉骨兮散作
九天之葩余因倚歌以和之杯盤狼藉不復知
身猶是客也夜半雪花如掌初在樹間漸搖光
入室忽聞剝啄聲從南來則魏令如石先生偕
亦史以大小阮戴笠來尋恍山陰一棹矣詩文

神通天地詎不信哉

百名家詩選

福清魏 憲惟度輯選

黃岡杜 游于皇 新城王士禛阮亭

南海程可則周量 空輿陳維崧其年 叅

毛師柱 字亦史號端峰太倉人

停舟

停舟聊騁望游子意何如山近初晴候潮平積
雨餘年華催渡客鄉夢過江書却羨垂綸叟柴
門坐釣魚

渡江

又作渡江客蕭疎兩鬢髮迴風欺薄酒細雨失
重嵐佳侶同舟得新愁別路諳今宵瓜渚夢白
髮在江南

憶東臯舊游

平山堂接山光寺幾度登臨有醉歌綠暗紅橋
深柳色碧涵青雀遠風波好花開遍春剛去殘
夢醒來客又過遙憶東臯舊游伴酒杯詩卷近
如何

謁露舫祠

遺廟停橈拜靈旗
颭水濱骨堅才見節
舫露恰全身一夕自
千古百年無二人
高風湖水潔不敢
薦青蘋

韓侯釣臺

列爵淮陰帝業開
桐江還有客星來
漢家宮闕銷沉盡
寂寞乾坤兩釣臺

珠梅道中

和宋青淵

夕陽山好青無數
千頃湖光亂鷗鷺
細草微波

兩岸明荷香靜繞珠梅路荷葉荷花十里餘輕
風帆影度徐徐波紋蕩衍湘簾淨綠水青山畫
不如移情獨有江南客那得扁舟留十日夜夜
船頭對月明露濕荷香數聲笛

四女祠

古祠祀四女不知姓名誰祠荒舊聞失衆口留
殘碑養父誓不嫁形影相追隨四女同一心石
轉心不移我行過祠下再拜增欷歔巾幘著純
孝自顧慙鬚眉親老不得養飄泊徒天涯昨夜

夢中見彷彿還家時
仰彼四女風子職誠多虧
引領望天末雲影空遲遲

舟夜苦熱與張時叔鄧獻誠借宿僧院中
夜起坐偶作

月落空林幽禪燈照深廣
羣風露光動高梧滴
清響仰視大火沉殘河數星朗
坐令煩暑銷襟懷
濯新爽願言塵軼息來結滄洲想

燕臺重九後六日讌集黃天濤寓齋同沙
定峰顧仲光鄭有章吳六平諸子分得

中字

繁絃急管對花叢尊酒何妨日日同剩有萸香
還訪菊轉因萍合慙飄蓬清砧月皎疎燈外白
雁秋殘好句中醉後莫辭投轄飲幾人淪落滯
江東

贈閩南阮疇生

十年詩卷客天涯好句吟殘日影斜遼海風塵
餘皁帽燕山冰雪對黃花枕椰月老三秋樹鴻
雁書廻萬里家澹却宦情清夢穩肯從勾漏問

丹砂

都門旅夜寄王虹友顧伊人江位初沈台

臣諸同學

客路三冬近寒齋百感增
柳無霜後葉硯有臘
前冰詩意驚秋髣鄉愁語
夜燈南鴻飛已盡書
札總難憑

寄祝東臯冒巢民先生雙壽同紀伯紫黃
天濤周翼微陳緯雲郁東堂集冒穀梁

寓齋賦

花發江南候春生
前北天山川餘舊老風雅寄
林泉道已隨時拙
名還與世傳鹿門看繼響偕
隱自年年

記宿高齋夜春風一載餘
幾聽燕市筑三寄廣
陵書白石心堪許
青門髻未踈秋江征棹穩好
復傍樵漁

贈送曾則通南歸臨江

矯矯風塵對玉壺
忽驚鄉思滿菰蘆
青箱舊識才多少
黃閣寧論夢有無
燕市鶯花供帳客
峽

江烟雨掛帆圖君歸是處容高卧吟過春山大

小孤

曾爲二雲先生令似

訪魏惟度賦贈

虎觀箕裘振後昆圖山旗鼓樹中原雄才盡壓

南皮座古訟頻邀北海尊

惟度客天雄與孔心一觀察爲道義交

千載風騷歸纂述一時葩藻許評論深知更有

黃扉老

惟度與相鄉相國游最蒙器重

肯向平陽爲埽門

聞聲猶憶滯京華手把君詩坐日斜千頃澄波

悲宿草

昔年于黃述之大叅京邸讀惟度詩今述之下世已二載矣

幾年秋



水賦蒹葭鄉心易老漳河樹歸興難尋震澤槎
籬菊開時俱在客相逢那惜百壺餘

讀海陵黃天濤曲阿詩集賦贈

故人踪跡近何如一載辭家賦索居到眼青山
看北固過江紅樹問南徐他鄉句好風塵外久
客名藏感慨餘此日悲歌同擊筑對君詩卷倍
躊躇

冬暮偕曹九咸客吳門喜遇弘導憲尹兩

王子排字成詩各得一首

爲客看冬盡逢君語夕天月微殘笛裏鴻苦斷
鐘前水落湖田濶烟開浦樹圓一尊吳市酒飄
泊問歸船

吳門舟夜寄懷朱祖義黃又文王誦侯徐
寔發

落帆驚邂逅酌酒在天涯別思看楓樹秋吟負
菊花江山餘客夢風雨誤歸槎憶得書齋夜踈
燈帽影斜

贈吳星若

上客年方少身閒旅思輕江山供嘯詠湖海識
詩名學已窺微妙才應敵老成翩翩衛洗馬凝
望玉壺清

鄭驛留賓地吳關作客時青衫曾入幕紅燭共
卽卮庚戌秋日于鄭闇齋別憶帆開疾書曾雁
民部座上得識星若
到遲漳河重把袂三載慰相思

辛亥元夕吳梅村先生招陪吳湖州茵次
同余潛心王湘碧惟夏次谷許九日碩
伊人沈台臣讌集樂志堂卽席分賦兼

呈湖州

名園上客及芳辰
擊鉢傳柑滿座春
月裏樓臺千尺水
酒邊裙屐六朝人
銀燈入夜翻如畫
玉管凝雲細若塵
太守風流遲識面
故應慙愧是勞薪

題陸鴻逸春星草堂

柴桑楊柳邵陵瓜
竹塢茅堂傍水涯
奴有千頭還種橘
客來雙眼但看花
犁歸春雨烏犍健
書對秋燈皁帽斜
從此幽棲清夢穩
庾須林壑卧

烟霞

壬子早春同周鳳徵呂雪洲徐東白沈台

臣諸子集眉照半樓卽席分韻得中字

茅屋由來問已公開樽擊鉢幾人同雨餘壁蘚

生寒綠春到江梅綻小紅一磬響通千竹外半

樓詩老十年中鬢絲禪榻今宵聚愁向河橋話

轉蓬

時余將
有北行

涇城喜雪次如石叔元韻

東風側側影紛紛飄灑何妨兩鬢侵豈是庭除

天雨玉已知丘壑麥含金青黃頓轉三春色蒼
赤都安四野心却惟吳儂愁亦埽閒牕披褐有
微吟

崇川邵潛夫先生老客東臯以予過從問

疾有詩枉贈依韵奉酬

時年八十有五

苦節論耆舊似君今日稀滄桑餘獨樹歲月掩
雙扉共識龐公隱誰憐杜老饑病來詩愈好回
首見風徽

叢舍英孝廉招同王阮亭諸公登湘中閣

望雨

高閣懸崖面面同，遠天和樹晚濛濛。
雲半掩池邊片，簷溜斜廻竹下風。
幾度登臨春思老，春年過巢民與共，年此時賓從旅愁空。
五湖烟景瀟湘雨，併入山牕一望中。

六月十一夜冒巢民先生招同杜茶村陳
其年杜武功葉桐初許山濤暨令弟無
畧放舟水繪卽次巢民泛月元韻二首

日舫清池際晚晴，好天華月照閒情。
藤蘿掩岸

如無徑簫管變波別有聲林影破時燈遠合漲
痕齊處柳低橫溪陂赤墜今千載彷彿身疑畫
裏行

回首春宵此再游

春暮阮亭諸公泛月
此間有唱和詩刻

鉢池烟

月夏偏幽波光直過堂前檻竹色平添閣外洲
靜極祇嫌蟲響雜坐深頻見翳雲收故人隔歲
輕分手客裏相逢興轉遒

舍桴寓菴答黃長孺前輩

憶昔追隨恨未能三旬偏喜佛龕燈吟殘夜雨

同爲客聽到晨鐘半是僧月榭影無雲一點松
愔風有葉千層他時清境應重覓人在江南未
可憑

田父詞

同顏佳胤石夏宗
月川社集分賦

老農生長婁江邊自言力作思逢年那知年豐
更愁苦令我不得中宵眠箱中有粟囊無錢公
庭敲骨真可憐傾箱不足了官稅依然土銚無
炊烟嗚呼人生筋力百可用慎莫歸種江南田

題平陀僧慧雨畫梅冊子

君無累勝於僧十年同學晨星在裘馬何須問
五陵

送睿石渡江之靈隱同曹文虎張孺子限

高字 二首

湖山千里不辭勞南北雲峰問兩高君去定憐
吾尚住江鄉驢背首頻搔

瓦官閣下師曾住

時睿石從金陵過東臯

回首橫江白浪

高此去聽松靈隱夜尚疑風雨亂波濤

濟寧道中和周六皆

千株楊柳暗長堤重碧陰陰覆綠漪大似平山
堂畔路踈籬淺渚日斜時

楊柳青

去天津南四十里

莫說他鄉楊柳青客愁如醉幾曾醒故園楊柳
青無數夜夜三更笛裏聽

小引

魏子曰余性喜遊每身到處環峰洄溪必驚遠
陵危以致之未嘗爲屐齒自也近稅駕魏郡
平原萬里絕無山水可容寓目不得不搜名下
詩篇以常之心一孔觀察出十數家見貽初得
劉夢閣則氣厚詞敷以當泰岱澎蠡再得孫雪
厓則意高文秀以當匡廬西子湖再得張企鵬
則語圓格老以當白嶽王屋平湖語溪得成仲
謙則天目湘江也得黃石笥志伊喬梓則京峴

蕩湖也美中則羅浮西洱也最後得訥菴先生
臥而遊焉起而問焉出而入作而息咏歌而贊
嘆焉曰此天台雁宕入海求神仙處也寧僅作
詩觀

百家詩選

福清魏 憲惟度輯選

山陽丘象升曙戒 上元程 瀚瞻菴

溧陽吳 穎見末 華亭張陳鼎梅巖 叅

黃之鼎 字訥庵元城人

送盧明府之任永寧

南服新開萬里天懷柔 聖主藉才賢麓山春
柳盈盈綠盤水秋帆的的懸自許清風消瘴癘
還餘白雪淨烽煙扳轅莫漫悲離緒佇有徵書

嶺外傳

七夕翕亭分賦

西風昨夕下庭柯
又見雙星夜渡河
烏鵲虛傳天上會
白駒真自隙中過
尊前客夢驚砧杵
雨後秋容老芰荷
大巧由來爭似拙
漫將歲月蹉跎

秋日登金佛寺閣和張司馬次先壁間韻
僧樓爽氣入秋含
萬木蕭疎郡堞南
遠野河流連寶筏
前朝御墨出琅函
拚將老圃黃花酒
靜

對松陰白石菴歸路太行遙
迥晚風馬首散晴嵐

永豐門餞別諸進士復至閒閒亭小飲

官柳青青去騎催
旗亭祖帳夾城開
尋芳爭過陶潛宅
得意群登郭隗臺
驛路濃花看攬轡
春郊細雨對啣杯
落英歷亂還堪賞
爛醉無愁騎馬回

西園餞杜少兄弟分一先

細雨滌煩暑
開尊對暮天
催無妨卜夜
別已憶

經年入洛十
擅遊梁道並傳御河秋水發凝
醉孝廉船

大伾山和王宗伯壁間韻

炎帝崇青岳伾山祀玉壇
穴龍晴帶雨駐馬夏
仍寒翰墨存先達風流紀漢官
客來尋往蹟感慨向空磐

衛輝道中

天風吹雨脚驛路出雲門
細細霑行色瀟瀟靜
客魂山深竹抱舍地僻水環村
何日絕塵累結

茅近石根

趙秋水飲翁亭

余自漳干返君從江左來相逢忽此地靜裏一
啣杯亭側籠煙出池荷帶雨開新詩看更好應
爲故人裁

西園社集

結客從蓮社攜榘過竹扉鶯花春欲老京國夢
初歸盤曲遲明月臺空落遠暉一尊堪永日莫
自羨輕肥

客蘇門

共城城外鬱蒼蒼
虎踞龍蹲勢欲翔
日暮憑欄
山色裏湖光一片落斜陽

嘯臺

天外驚風久不聞
荒臺欹側對斜曛
靈源日暮
微風發入耳
濤聲恐是君

諸大夫園

翠筠叢裏水雲鄉
不數名園古辟疆
因憶吾家
舊綠野
衛河南畔有山堂

共城別

探幽有弟稱豪絕倚馬蕭蕭望百門約待向平
人事畢杖藜攜手入雲根

贈周輝縣四明

羨爾神明宰英英玉不如下交方倒屣有雨忽
隨車祈穀情偏愜勤民志可舒故鄉原在望曾
否潤吾廬

蕭寺喜雨

一雨蕭蕭入夜豐朝來雙樹盡菁蔥不知隴上

還深淺早起科頭問遠公

夏日社集

折簡成高會
芙蓉照一亭
綠披葉向老
香淨雨初經
地最宜明月
人還望德星
晚來堪共醉
夕爽下疎櫺

七夕飲白衣閣兼約次日郊外看蓮

曲徑夕陰合
危樓夜色分
雨餘憐素月
客至依慈雲
鵲渡歡無極
蟻浮興不羣
明朝烟水外
莫更負論文

依韻答田石虹

風流端不愧田郎別後積思日與長忽沒相逢
中水曲還期結伴伍山陽尊前矯矯青雲志袖
裏洋洋白雪章正是楓宸求賦草同時司馬早
遊梁

寄咏友人齋中白芍藥

聞道維揚種移來傍硯池瑞分金帶勝色並玉
盤奇調鼎推冰骨翻堦重素姿錦亭應有待可
許共啣卮

息園社集同臧介子年兄

日日春園醉琴尊復此同柳含遠水綠花映隔
簾紅興劇來佳客亭虛受好風漫言城市近隨
地有牆東

秋日西園小集同方與三吳小修邵凌玉
城頭落日散晴暉有客攜琴坐翠微傍晚涼颺
生竹徑隔籬梧葉下朱扉歌傳出塞名方籍賦
就藏山願不違白是風流堪共戀非關投轄可
忘歸

中秋前一日同李艷寔蘇眉仙飲程介侯

南園

城下層臺接畫樓登樓月色滿城頭何期元禮
能同御不謂眉山此共遊入座烟巒青欲近遠
離竹樹翠還浮當筵未盡論詩典明夜清光尚
可求

九日繁陽僧舍

惠公精舍柯城闔裏擾空香已二旬作客忽驚
重九日銜杯深負百年身黃花孤挺依寒圃白

雁羣飛渡遠津回首故園山徑在淵明何事滯
歸輪

贈居停僧慧引慧實遊于酒故篇中及之
結宇依神境虛空遠市廛盆花秋散馥溪月晚
生烟濁酒能違俗清齋可悟禪客來容下榻昏
旦與周旋

鄴城懷古

霜落天高暑氣澄西來嶽色引孤藤異方雲木
漳南近前代風流鄴下稱歌舞幾年空總帳山

川片石認韓陵側聞崑崙多仙侶何日移家最
上層

客邸邀胡存人小飲詩以代柬

山城百里隔滄浪回首西風感異鄉
僧舍靜好開竹徑待求羊

天畔歸鴻永夜聞臨邛車馬恰同群
分來香積
厨中飯擬向山房臥白雲

小引

魏子曰曩余選詩持白門張瑤星袖楊樹滋詩
訪于清涼峰下余快讀之多陸海曹先生倡和
之作聞其名未審其人也迨入都登栢鄉相國
之堂讀觀始集載陸海詩甚夥雖審其人亦未
謀其面輸其心也慨然曰生則同時居則異地
有幸有不幸耳昨過繁陽方令尹竹友始出陸
海緩齋集見示并辱書相推轂捧讀之下如身
處洿池得擾神龍而探頷珠忽不知其喜之何

從也大抵陸海詩刻意求古人嚶嚶然視其鄉
獻吉輩超乘而上庶幾乎挽波流而登彼岸坐
進于古之作者而無難然古之作者先取法次
聲調次才情法得則範我馳驅獲禽多也聲調
得則憂以鳴球瓦缶奔也才情得則天籟所吹
萬有俱動素質所先于絢改色也陸海其詩之
神乎神也而軌于道矣至其序傳碑記取精于
六經百家事論史論具千百年手眼爲今時管
葛行將訂謨定策造天家不援之基豈徒以翻

嗣國士奏清廟明堂之什已哉然余所期于公
者以公世爲儒宗廣雅秋波八絕三桂皆擅譽
今古溯濟陰積石爲倉以敵二酉赫赫若前日
事余不揣爲能始宗伯續成此集固公家舊業
也悠悠斯世疇復深知殆將與陸海相與有成
矣